

Lovlà l'printemps

Béteot l'printemps  
L'vint n'chuffiële pus si fort  
L'hiver i-est quasi mort  
I-in ara mis du temps

Lonmint restée à jocque  
Ch'est l'moumint d'l'ormuer  
Li donner ein queop d'pied  
A l' terre buquer toc toc

I-est tout proche l'meos d'mai  
L'muguet i-est tout in cloques  
Les cœurs batt'nt l'berloque  
Des amants passionnés

Dins les prés, tous l'z-infants  
Déhutt'nt de leu maseons  
Ornippés d'courts cotreons  
Ch'est fin gai l'printemps

I queur'tent dins l'berdoule  
ch'est à qui s'ra l'pus cras  
Pof' manman, queu tracas !  
I-z'orvif'nt les arsoules

Les hierpes i raverdiss'tent  
Les z'ozieaux font leu nid  
Ch'est l'nature qui orvit  
Comme ch'est bieu : tins, ravisse

Les guernoules qui font croa  
Dins l'étang les picheons  
S'amus'tent à faire l'plongeon  
I s'in donn'tent à cœur joie

T'intinds l' chichouïque des geais  
Qui s'muchent dins les buisseons  
D'sus les arpes les bourgeons  
Impatieints d'esploser

I z-intam'nt leus z'orfrains  
Les ozieaux tôt l'matin  
Quanc'que l'air i-est cor' cru  
Que l'jour i-est suspindu

Mi on l'sait j'aime pos l'bure  
« Ahais » dit l'fleur de bure  
Eine soupe d'pichoulit  
Lovlà t' pieau qu'elle guérit

Rwète les picreons qui dans'tent

Déjà d'puis beon matin  
Ch'est qui f'ra bieu à d'main  
Du bieu temps pour l'romance

L'prumiers rayons d'solel  
Dérif'tent dins l'ciel bleu  
On s'sint d'jà fell'mint mieux  
L'printemps i s'dérévièle

Et si l'temps i-est acruï  
Qui fait même ein peu fraike  
Ch'est estra pour el'pèque  
Arriv'ra l' rimbelle

D'raviser ceulle bieauté  
Rimplit m'cœur in ameur  
Tout m'invite au bonheur  
J'souris d'bénaiss'teté

L'déplaisi cha n'dure pos  
Ch'n'est qu'un mauvais moumint  
I-ara d'meillieux lind'mains  
N'te carmouss'te pos d'treop

Suis sach'mint et'quémin  
fais confiance à la vie  
L'paradis ch'est ichi  
Profite d'chaque moumint

## LEXIQUE

chuffiélér : siffler  
à jocque : au repos, en attente  
buquer : frapper, heurter  
cloque: cloche, clochette  
battre l'berloque : divaguer, battre la  
          chamade  
déhutter : sortir  
ornipper : vêtir, habiller  
cotreon : jupon, vêtement  
queurir: courir  
berdoule: boue  
arsoule: enfant turbulent, galopin  
hierpe: herbe  
raverdir : reverdir, reprendre de la santé  
raviser : regarder  
guernoule : grenouille  
picheon : poisson  
chichouïque : chant du pinson  
s'mucher : se cacher  
arpe : arbre

orfraïn : refrain  
fleur de bure: renoncule, bouton d'or  
bure: beurre  
pichoulit: pissenlit  
rwettier: regarder  
picreon: moustique  
dérivér: arriver, arriver de façon  
          énigmatique  
s'déréveiller: se réveiller  
acruir : mouiller, être humide  
fraike : frais  
pèque : pêche  
rimbellie : embellie  
ameur : émotion  
bénaiss'teté : bonheur, contentement  
déplaisi : chagrin  
s'carmousser: se tracasser  
sach'mint : sagement  
quémin : chemin